

Ел қоғаны - қарулы күш !

«Жастары жалын жүректі, өршіл
намысты,

биік рухты болса, ол елдің еңсесі биік
болады».

Н.Ә.Назарбаев

Қазақ деген пейілі кең, бай халық,
Толды арманы егеменге айналып.
Бейбітшілік қорғанындай сенімді,
Сарбаздары сап түзейді сайланып.
Батыр болған бабалары,
Ел бастаған даналары.

Байтақ жерге жау тигізбес,
Қазағымның сарбаздары!

Отан - әр адамның туып өскен жері,
атамекені. Біздің Отанымыз - Қазақстан.
Ата-бабаларымыз сан ғасырлар бойы
ұлан-ғайыр ұлы даламыздың еркіндігі
мен дербестігі үшін жан аямай күресті.
Ұзақ жылдар бойы бодандықты бастан
кешіріп, сұм соғыстың тауқыметін тар-
тып қаншама зардап кешті десеңізші?!
Туған елім небір сұрапыл оқиғаларды
бастан кешсе де, мойынсұнбай, әлем
картасынан ойып тұрып «Қазақстан»
деген керегесі мықты мемлекет құрды.
Қазақ елі - қайсарлы да батыл, айбатты
да асқақ елдердің бірі. Осындай еңсесі
іргелі, тұғыры нық, ырыс пен ынтымағы,
береке мен бірлігі жарасқан елдің ұланы
екенімді мақтан тұтамын.

Тәуелсіз еліміздің тыныштығын
қорғайтын Қазақстан Республикасының
Қарулы Күштерінің құрылғанына би-
ыл 25 жыл толып отыр. Қарулы Күш-
тер - мемлекеттің тағдырын, ішкі
тұрақтылығын, қазіргі әлемдегі орны
мен маңызын айқындайтын құрал-
дардың бірі. Осындай аз ғана уақытта
Қазақстанның Қарулы Күштерінің абы-
ройы мен айбыны асқақтап, іргесі берік
қаланды. Қазақстан Республикасының
Қарулы Күштерінің Жоғары Бас қол-
басшысы – Елбасы Н.Ә.Назарбаев.

Қазақстан Республикасының Қарулы
Күштері: құрлықтағы әскерлер, Әскери
теңіз флоты, Әуе қорғаныс күштерінен
тұрады. Қазақстан армиясының сапында
74 мың сарбаз бар. Оның ішінде Құрлық
күштері қатарында - 47 мың, Әскери -
әуе күштерінде - 19 мың, Әскери - теңіз
күштерінде - 3 мың адам қызмет етуде.

Қазақстан Республикасының
Қарулы Күштері қатарында қызмет
ету - әр азаматтың абыройлы міндеті.
Қаруы Күштердің ұрысқа дайындығы
мен қабілеттілігін жоғары дәрежеде
қамтамасыз етудің негізгі кепілі - жан-
жақты дамыған, қазіргі техника мен
қару-жарақты игерген, денсаулығы
мен дене дайындығы жоғары әскери
сарбаздар.

Отан қорғауды біздің елімізге ша-
буыл жасаған сыртқы жаулармен қару-
лы күрес деп қана түсінбеу керек. Біз
Отанымыздың күш-қуатын нығайта
отырып, оны бейбіт уақытта да атсалы-
сатын күш деп білгеніміз жөн. Қазіргі
армия жауынгердің ерік-жігері мен
психологиялық төзімділігіне үлкен
талап қояды. Ол әскери техникаларды,
оның ішінде өте күрделі әскери маши-
наларды, ракета кешендері мен радио-
электрондық жүйелер, жылдам ұшатын
әуе кемелерін шебер меңгеруді талап
етеді. Бұл жерде жауынгердің ұйымшыл-
дығы мен тәртіптілігі қажет. Ал әскери
тәртіпті білу, оны орындауға әзір тұру
- әрбір жас өреннің өзін қалыптастыру
мен әскери қызметке дайындалу жолын-
дағы маңызды қадамы деген сөз.

Еліміздің батырлары ең алдымен
елін сүйген, арын ардақтаған. «Атамек-
ен жері үшін, қасиетті елі үшін, Болмай
қалар кім батыр!» - деп Бауыржан
Момышұлы айтқандай елін қорғау,
Отан алдындағы борышын өтеу -
әрбір азаматтың қасиетті борышы.
Менің замандастарым халқымыздың
қажыр қайсарлығынан қуат, өрелі
өшпес сөздерінен өнеге, тағылымды
тәрбиесінен төлім, батылдығынан
бойына күш-жігер жинап, қазақ елінің
ұлтжанды қыраны болатынына кәміл
сенемін.

Бүгінде Қазақстан халқы өзінің
айбынды азаматтарына сенеді және
мақтан тұтады, өйткені армия-
мемлекеттің құрыш қалқаны.

**Жұлдызай Жолдасбай,
«Ақтөбе медициналық колледжі»
МКҚК «Мейіргер ісі» мамандығының
104-топ студенті, Ақтөбе қаласы.**